



Na osnovu člana 17. tačka 28. Zakona o Visokom sudskom i tužilačkom vijeću Bosne i Hercegovine („Službeni glasnik BiH“, br. 25/04, 93/05, 48/07 i 15/08), razmatrajući Nacrt zakona o zaštiti prava na suđenje u razumnom roku, koji je dostavilo Ministarstvo pravde Bosne i Hercegovine, aktom broj: 06-07-25-5517/18, Visoko sudsko i tužilačko vijeće Bosne i Hercegovine je, na sjednici održanoj 18. novembra 2020. godine, dalo sljedeće

## MIŠLJENJE na Nacrt zakona o zaštiti prava na suđenje u razumnom roku

I Visoko sudsko i tužilačko vijeće Bosne i Hercegovine (u daljem tekstu: Vijeće/VSTV BiH) konstatuje da je materija sadržana u predloženom tekstu Nacrtu zakona o zaštiti prava na suđenje u razumnom roku (u daljem tekstu: Nacrt zakona) od uticaja na pravosuđe u Bosni i Hercegovini, u smislu člana 17. tačka 28. Zakona o Visokom sudskom i tužilačkom vijeću BiH, te daje mišljenje kako slijedi.

II Vijeće je sa konceptualnog aspekta razmotrilo Nacrt zakona, bez upuštanja u detaljnu analizu pojedinačnih odredaba koje će biti predmet rasprave u proceduri njegovog donošenja, te je imajući u vidu da se Nacrtom zakona osigurava mehanizam za zaštitu prava na suđenje u razumnom roku načelno saglasno s njegovim donošenjem, izuzimajući odredbe u odnosu na koje su istaknute primjedbe u tački III ovog mišljenja.

III Ne dovodeći u pitanje potrebu zaštite prava na suđenje u razumnom roku i u postupku istrage, podsjećamo da su članom 225. Zakona o krivičnom postupku BiH<sup>1</sup> propisana jasna pravila o rokovima za okončanje istrage, proceduri produžavanja propisanih rokova i nadležnostima glavnog tužioca, te je propisana mogućnost podnošenja pritužbe zbog trajanja postupka glavnom tužiocu. Uz zapažanje da ni pratećim obrazloženjem nije pojašnjen odnos između predloženih rješenja i odgovarajućih odredaba ZKP-a BiH, Vijeće zaključuje da postoji kolizija između predmetnog dijela Nacrta zakona i propisanih pravila krivičnog postupka, te **nismo saglasni** sa pripremljenim normama koje se odnose na primjenu zahtjeva za zaštitu prava na suđenje u razumnom roku i u odnosu na trajanje istrage.

IV Vijeće pozdravlja provođenje zakonodavnih aktivnosti na regulisanju zaštite prava na suđenje u razumnom roku na svim nivoima u BiH, ali ponavlja stav iz Mišljenja broj 01-02-1-633-5/2020, od 14.5.2020. godine, kojim se izjasnilo na zakonodavne inicijative u ovoj oblasti u entitetima i u kojem je ukazalo na značajnu neusaglašenost predloženih rješenja, koja može dovesti do toga da zaštita prava na suđenje u razumnom roku neće biti na adekvatan način obezbjeđena u Bosni i Hercegovini.

Broj: 08-02-1-2591-3/2020

Datum: 18. novembar 2020.godine

Dostavljeno:

- Ministarstvo pravde BiH;
- a/a.



<sup>1</sup> Službeni glasnik Bosne i Hercegovine, br. 3/03, 32/03, 36/03, 26/04, 63/04, 13/05, 48/05, 46/06, 76/06, 29/07, 32/07, 53/07, 76/07, 15/08, 58/08, 12/09, 16/09, 93/09, 72/13, 65/18